

Inissianik attartortut piffissaq eqqorlugu akiliuteqartartut siunissami attartortunut akiliineq ajortunut akiliussisarnerannik aningaasartuutinullu taakku akilinngisaannik akiliisarnerannik pisussaaffeerullugit, inissianik akiliutit aalajangersarneqartarnerat pillugu maleruagassanut atuuttunut Naalakkersuisut allannguutissaannik siunnersuusiornissaat pillugu Inatsisartuni aalajangiiffigisassatut siunnersuut.

(Inatsisartuni ilaasortaq Kim Kielsen)

Akissuteqaat

(Ineqarnermut, Pinngortitamut Avatangiisinullu Naalakkersuisoq)

Siullermeerneqarnera

Inatsisartuni ilaasortaq Kim Kielsen ineqarnermut akiliutit aalajangersarneqartarnerini maleruagassanut atuuttunut allannguutissanik siunnersuusiornissamat Naalakkersuisut peqquneqarnissaat pillugu Inatsisartuni aalajangiiffigisassatut siunnersuummik saqqummiussivoq. Attartortut piffissaq eqqorlugu akiliisartut attartortut akiliisannigisut ineqarnermut akiliutissaannut akiliisittarunnaarnissaat kissaatigineqarpoq.

Inatsisartuni ilaasortaq Kim Kielsen Inatsisartuni ilaasortap Malik Berthelsenip 2012-imi § 37 naapertorlugu apeqquteqaataanut innersuussivoq.

Akissummi tassani suliassaqarfimmut maleruagassat, Inatsisartut peqqussutaanni nr. 2-mi, 12. maj 2005-imeersumi allassimasut innersuussutigineqarput. Maleruagassat atuuttut politikikkikut isummerfigineqarnissaannik Inatsisartuni ilaasortaq Kim Kielsen kissaateqarpoq. Eqqaasitsissutigissavara Inatsisartut peqqussutaat Inatsisartuni sularineqartarmata, aammalu piffissami ingerlasumi politikikkikut isumaqatiginninniarnit inernerisarmatigit.

Taamaattumik tassani maleruagassat atuuttut kisimik pineqanngillat, kisiannili suliassaqarfimmut politikikkikut isummerneq pineqarpoq. Taamaattumik aamma siusinnerusukkat najugaqarfii aningaasaqarnerisa ataqatigiinnissat, aningaasartuutillu isertitanik illuatungilerlugit missingersuusiorneqartarnissaat erseqqissumik isummerfigineqarsimavoq.

Taamaakkaluortoq imaassinnaavoq ineqarneq pillugu Inatsisartut inatsisaata allanngortinneqarnissaanut piffissanngortoq. Imaassinnaavoq pisortat inissiaataasa attartortittakkat qanoq iliorluni aaqqissuunneqarsinnaanerini Inatsisartuni misissuinnissatsinnut piffissanngortoq. Imaassinnaavoq najugaqarfinni aningaasaqarneq qanoq iliorluni ataqatigiissinneqarsinnaanersoq naliliiffigeqqissallugu piffissanngortoq. Tamatumani minnerunngitsumik siunissami aamma inissiat pitsaannerusumik aserfallatsaaliorneqartarnissaannik kissaateqarnermut naleqqiullugu isiginiarneqassaaq.

Maannakkut attartortuusut piffissaq eqqorlugu tamatigit ineqarnermut akiliisartut najugaqarfii aningaasaqarnerisa ataqatigiinnerinut qulakkeereqataasarnerisa

ajornartorsiutaaneranut Naalackersuisut isumaqataasorujussuummata qularineqassanngilaq. Naak akiligassaminnik akiliinngitsoortartut amerlagaluartut.

Siunissami pisortat inissiaataannut attartortittakkanut maleruagassat atuuttut annertuumik allanngortinneqarnissaat Naalackersuisut kissaatigaat. Tamanna pissutigalugu ineqarnermi aqqissuusseqqittoqarnissaanik Naalackersuisut kissaateqarput. Peqqussummi nutaami ilaatigut inissiat najugaqarfinnut mikisunut namminersortunut, amerlanertigullu aningaasaqarnikkut sanngiitsunut aqqissuunneqassanersut, imaluunniit ineqarnermut akiliutit nuna tamakkerlugu atuuttussatut nammaqatigiiffiunerusumillu aalajangersarneqartassanersut, taamaalillunilu akiitsunut akilinngitsuukkat annertunerusumik eqqarsaatigineqarsinnaalernissaat isummerfigineqassasoq Naalackersuisut kissaatigaat.

Naalackersuisuni siunnersuut qujarunneqartorujussuuvoq, tassani immikkoortoq pingaaruteqartorujussuaq qaqinneqarmat. Taamaattumik suliassap sularineqarnissaanut, aammalu attartornermut inatsisip iluarsanneqarnissaanut ilanngunneqarnissaanut Naalackersuisut isumaqataasorujussuupput. Taamaattumik apeqqut ineqarnermut inatsisip iluarsartuuteqqinneqarnissaanut ilanngunneqassasoq Naalackersuisut isumaqarput, tamannalu tunngavigalugu immikkoortup taparserneqarnissaa inassutigineqarpoq.